

Jon gë

Laum nanë higë hë

Iropnanë bo inam

Laum nanë bo Jongë higë monam hë mïnggëngnë gïding hëm yëgënë Gaios hënam gom higë mogey long gëmo bokë. Gaios gë kristan ajen gïding hëm pento nam hëm higë monë hë achi rungbo hïrnam gokë, holoka Diotrepis hënam mi gom minyang suto longka hënam gokë.

Monïr lenam hë

Iropna bo inam hë (1-4)

Gaios mey hïrnam hë (5-8)

Diotrepis mey benhang nam (9-10)

Dimitirius mey poonëgo hëlong hïrnam hë (11-12)

Benmey nanë bo bennam hë (13-15)

1

¹ Si higë sum monë hë genbo Jon ngo kë,

Ngogë ayang jïjanam ajen Gaios nom ngo higë sum mogeylong gëmo danaakë.

² Ajen hë, yalo hë poochom bo aï hëmlong mïngnam këbang hëm poomo toka hëlong ngo nom dïbi danaakë. ³ Jïjanë hëm mïnggëng geylong no dayëng dakë, hëlong mïnggëngnë hëkëna ngogë dakola pïng geylong benbinam hëm ngo taageylong achi rungbo henpo panaakë. ⁴ Ngogë homey gïding hë jïja hëm chen geylong idëkë hënam hëm tayë hëm henponam hëm henpo yongnë damongkë.

Gaios mey hïrnam hë

⁵ Ngogë ayangnam ajen hë, nogë dakola chenra mongnam bïrmë nïro pïngnë gïding hëmsin no poobo ibideyu. ⁶ Nogë ayangnam hëm malu solo danë mïnggëngnë gïding hëm benbi deyë, hëbë malum bitolong inyëng motoka, hëbë inam hëm Sï konglik danakë. ⁷ Jïsu gë poonë yuunyïng hëm benbi nabo

malugë inyë hëm malu mïnggëng mongnë gïdïng gë binam hëm heygosin longrik mong dënakë. ⁸ Hëbë igeylong ngulu malum bidum dindë naakë, hëbë ibëning ngulu sin jïjanë hëm benbinë malugë ajenbo iyëteykë.

Dioterpes nyi Demitirus

⁹ Ngo mïnggëngnë gïdïng hëm higë mogeylong gëmo bakë, hëbë ijagabo Dioterpes genbo idëbo mïng geylong ngulugë higë mogeylong gëmonam hëm taang mongkë. ¹⁰ Hëbë igeylong kogë ngulum inam gïdïng hëmlong ngulugë tungbï ga mi hëm poomongnë benbinam hëm, holoka hëmsin henpïng mongbo pïngnë mïnggëngnë gïdïng hëm longrik mongbo ibo kulong, holoka biteynë hëmsin biyoka hëbë kulong binë hëmsin kërbom nam hëm ngo holo ongyë hëm mënnom benbi yëku teykë.

¹¹ Ngogë ayangnam ajen hë, poomong bo inam hëm konggë yoka, poonë inam hëm konggë toka. Poonë hëm inë mi hë Sïgë mi hëkë, holoka poomongnë hëm inë mi hë Sï mey chen mongnë mi hëkë.

¹² Demitirus mey këbang hë hïrda, holoka maïgë jïjanë hëm taanam ga maïgë poonam hëm konglenbo ida, holoka ngulu sin kom hïrdë naakë, ngulugë bennam hë jïjanam hëm mënno këbang hë chendë nakë.

Poobo dalong kuka hënam hë

¹³ Mënnom higë mosë hëdey ngoka aaï dadëkë, hëbë ijagabo ngo kolom nïnglong rong nïng higë molïng mongkë. ¹⁴ Ngo mënnom kongpong raadong totey mïngdë naakë, holoka holo ngulu mimo la barïk ralong juka.

¹⁵ Mënnogë apom la Sïgë sakpo nam hë dalïk neyka.

Solo danë mënnogë ajen gïdïng hë mënnom Poobo dato longkë hëdëkë. Holo danë ajen gïdïng hëm ngo poobo dato longka hëdë kë hëbi toka.